

E Orde Antiguo y Mistico Rosa Cruz ta tene

Ceremonia di conmemoracion

ORANJESTAD (AAN):— Tur aña miembronan di e Ordo Antiguo y Mistico Rosa Cruz ta bini hunto pa conmemora e construccion di e Piramid Grandi di Egipto, cual Piramid e historiador nan ta pretende ta di Farao Khufu, (m.o.m. 2650 prome cu Chr.).

E reunion ta worde teni riba e fecha mas cerca di comienzo di otoño, esta 23 di September. E planificacion y construccion di e Piramid ta

revela un conocimiento increibel di aritmetica, geometria, fisica, geografia y astronomia. Esaki ta keda un misterio pa tur e cientificonan di awor y un provocacion pa nan mente.

Segun tradicion di e Rosa Cruz nan e Piramid a worde construi hopi ciclo prome cu reino di Farao Khufu y nunca a worde uza como kelder. E Rosa Cruz nan ta opina cu e Piramid tabata worde uza como un tempel pa

instalacion di nan miembronan pa cu e schoolnan di misterio. Pa nan e tempel aki ta simboliza e caminda di instalacion cu hende mester tuma pa halza su mes di e estado cu e ta den pa yega na un estado di perfeccion cu ta nos meta di desaroyo final. A.M.O.R.C. ta un ordo consagra tradicional cual su raiznan ta den e Egipto antiguo m.o.m. 1500 prome cu Cristo durante reino di Farao Thutmosis III.

Su forma actual el a obtene bou e poderoso energia di Farao Amenhotep, mihor conoci como Akhen-aton. Ciclonan largo el a trece su sabiduria na su consagrador nan den forma verbal y skirbi. E Ordo no ta un secta ni un religion. Su unico ideologia ta pa contribui na e desaroyo y reconstruccion di hende su concientizacion y su curpa spiritual. Tambe e no ta un organizacion politico y su miembronan ta bini di tur nivel social. Su "motto" ta tolerancia y independencia completo sin "dogma". E ta ofrece su sabiduria na tur esnan cu ta interesa den e misterio nan di bida.

Su simbolo oficial ta e Rosa

Cruz y e simbolo aki no tin nificacion religioso. E cruz ta e curpa humano y e rosa ta e alma den su desaroyo continuo. Aruba Chapter AMORC ta invita tur miembro, no-miembro y interesado pa asisti na e

conmemoracion aki, diadomingo 17 september pa 4'or di atardi, na edificio di Aruba Chapter AMORC, situa na Savaneta. Sea asina bon di ta presente mey ora prome.